

REPUBLICA E KOSOVËS - REPUBLIKA KOSOVO
KOMUNA E VUSHTRRISË-OPŠTINA VUÇITRN

Nr. /Br. 26709/26

Nr. i fq. / Br. st. -19-

Data: / Datum: 25.06.2026

VUSHTRRI - VUÇITRN



Republika e Kosovës
Republika Kosova – Republic of Kosovo
Komuna e Vushtrrisë
Opština Vuçitrn – Municipality of Vushtrri



Kuvendi i Komunës

01. Nr. PB-104/26 25/06/2026

PROCESVERBAL
NGA MBLEDHJA E RREGULLT E KUVENDIT TË KOMUNËS SË VUSHTRRISË,
MBAJTUR MË 28 MAJ 2026

Mbledhja është mbajtur në sallën e Kuvendit të Komunës së Vushtrrisë, duke filluar në ora 10:20.

Në këtë mbledhje ishin të pranishëm anëtarët e Kuvendit të Komunës së Vushtrrisë si: Behar Duraku, Blerina Shala, Diellza Pllana, Drita Dibrani, Edmond Hyseni, Fakte Dushi, Fatmire Cecelia, Fidan Bejta, Gentiana Rama, Isak Uka, Kushtrim Hyseni, Kushtrim Veseli, Melihate Basholli – Latifi, Mensur Kastrati, Mentor Ferizi, Mentor Hasani, Nasuf Aliu, Ramadan Parduzi, Hava Mlinaku, Pëllumb Maliqi, Refik Maloku, Rrahim Ajeti, Stefan Markovic, Vlerë Tahiri, Xhon Gubetini dhe Ymer Haradinaj.

Munguan: Berat Sadiku, Betim Grabanica, Mek Selaci, Leonora Gërguri dhe Gresa Muli.

Të pranishëm në këtë mbledhje ishin edhe Kryetari Komunës z. Ferit Idrizi, nënkryetari i komunës z. Shpëtim Zhergrova, përfaqësuesit e MAPL-së, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Mbledhjen e hapi dhe e kryesoi Melihate Basholli-Latifi, - Kryesuese e Kuvendit, e cila konstatoi se në sallë janë prezentë 26 anëtarë të kuvendit, kuorum i plotë për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Melihate Basholli- Latifi- kryesuese e kuvendit- përshëndetje për të gjithë. I nderuari Kryetar i komunës, i nderuar nënkryetarë, të nderuar anëtarë të kuvendit, drejtorë të drejtorive, përfaqësues të KFOR-it, të mediave, të shoqërisë civile, përfaqësues të MAPL-së, shumë të nderuar qytetarë të komunës së Vushtrrisë, jemi në seancën e rregullt të muajit maj. Fillimisht më lejoni që të gjithë ju që jeni të pranishëm këtu dhe qytetarëve të komunës së Vushtrrisë t'ju uroj festën e Kurban Bajramit. Në ndërkohë konstatoj që të pranishëm në sallë jemi 25 anëtarë të kuvendit, gjashtë të tjerë mungojnë, dy prej tyre më kanë njoftuar që nuk marrin pjesë, është Mek Selaci edhe Berat Sadiku, të tjerët po besoj që në ndërkohë vijnë. Të nderuar anëtarë të Kuvendit, sigurisht e keni marrë edhe materialin pas Komitetit për Politikë e Financa që i patëm dy pika shtesë, i shqyrtuam dhe i aprovuam në Komitetin për Politikë dhe Financa. Përndryshe ndryshime të tjera nuk kemi në

rend të ditës. Megjithatë fillimisht hapi diskutimin para rendit të ditës.

Ferit Idrizi- kryetar i komunës- I nderuar nënkryetar, qeveri komunale, anëtarë të kuvendit, përfaqësues të mediave, të KFOR-it, të shoqërisë civile, të gjithë të pranishëm. Të dashur qytetarë të Vushtrisë. Meqë jemi në ditën e dytë të festës së Kurban Bajramit, fillimisht më lejoni që juve anëtarë të kuvendit, të gjithëve t'ju uroj festën e Kurban Bajramit dhe po ashtu edhe qytetarëve të Vushtrisë. Gjithashtu ju uroj edhe dy anëtarëve të kuvendit të cilët i kemi në haxh, e kemi Berat Sadikun edhe Mek Selacin. Ju dëshiroj qëndrim të mirë atje, shëndet dhe pranim të haxhit. Faleminderit të gjithëve. Edhe kjo, është seancë me pak pika të rendit të ditës. Shpresoj që do t'i procedojmë bashkarisht të gjitha.

Vlerë Tahiri- anëtare e kuvendit- përshëndetje të nderuar të pranishëm, qytetarë të dashur. E shoh se në rendin e ditës në pikën e pestë është raporti i vlerësimit të dëmeve nga fatkeqësitë natyrore dhe fatkeqësitë e tjera në vitin 2025. Mirëpo shumë shpesh qytetarët më kanë kontaktuar edhe më kanë pyet se çfarë u bë me të njëjtin raport që është dalë në vitin 2023, në qershor të vitit 2023. Siç e dimë ne raporti bëhet prej drejtorisë së emergjencave, dërgohet në AME, AME-ja e dërgon në qeveri edhe prej atje komisioni i qeverisë i pranon ose nuk i pranon. Raportin e po atij viti, komisioni i qeverisë e ka pranuar edhe e ka nxjerrë një vendim i cili asnjëherë nuk u ardh në zyrat e komunës, mirëpo është konfirmuar përmes telefonit me zyrtarët e drejtorisë përkatëse. Qytetarët duke pasë parasysh se ju kanë premtuar kompensim për ato dëme, qytetarët kanë marrë edhe kredi dhe janë dëmtuar financiarisht, mirëpo dëmet asnjëherë s'janë kompensuar. Po kërkoj përmes kryetarit të komunës që të dërgohet një email dhe të kërkohej prej institucioneve përkatëse në qeveri ose në ministri dhe të sqarohet për qytetarët se si është puna e këtyre raporteve të cilat siç është me rregull duhet me u kriju prej komunës, janë krijuar, janë pranuar në qeveri mirëpo atje po ngecë puna. Tani qytetarët për këtë raport të vitit 2025 nuk e kanë besimin që do të u kompensohen dëmet. Kështu kryetarit i lutem ta sqaroj edhe njëherë, ndoshta e sqaroni më mirë. Derisa komuna i ka kryer procedurat e saj, unë kërkoj që të bëhet më shumë presion sepse qytetari ynë është dëmtuar. Gjithashtu më duhet të theksoj se gjatë fushatës lokale është premtuar nga vetë ish-kryeministri në njërin nga fshatrat e Vushtrisë që këto dëme do të kompensohen. Dua që sot të merret një vendim për këtë çështje dhe dua që të na premtohet nga kryetari se do të bëhet presion te qeveria dhe tek institucionet përkatëse rreth kësaj çështje dhe qytetarët të kompensohen për dëmet.

Dritë Dibrani- anëtare e kuvendit- Pasi i përshëndeti të gjithë deklaroi: Përderisa secili prej nesh këtu i gëzohemi investimeve në sport, investime të cilat në qytetin tonë janë të mirëseardhura nga cilado qeveri që udhëheq vendin. Si përfaqësues e qytetarëve jam këtu për të ngritur zërin e disa shqetësimeve të drejtpërdrejta që kam pranuar nga terreni gjatë kësaj periudhe. E para ka të bëjë me punimet në sheshin e qytetit. Punimet po shkojnë tejte ngadalë dhe është e pakuptueshme sesi një projekt kaq vital për Vushtrinë, në terren nuk shihen më shumë se 4 apo 5 punëtorë duke punuar. Qytetarët dhe bizneset po përballen me zvarritje, andaj kërkoj nga menaxheri i kontratës të rris urgjentisht presionin mbi mbikëqyrjen. E dyta është siguria e fëmijëve tanë. Një pjesë e ulësve në formë tribune, ku është mbjellur barë dhe lule, fëmijët po ngjiten vazhdimisht për të luajtur. Është kërkesë e prindërve që aty të vendoset një rrjetë apo barrierë mbrojtëse me qëllim që të parandalojmë ndonjë rrezik apo rast fatal nga pakujdesia. Çështja tjetër ka të bëjë me shqetësimet me hapësirat publike të cilat shfrytëzohen. Kam një pyetje konkrete lidhur me tarracat e banesave dhe lokaleve, si është e rregulluar kjo çështje me vendim zyrtar duke parë që po zihen trotualet dhe hapësirat e përbashkëta publike ku kalojnë edhe këmbësorët. Të nderuar kolegë, në mbledhjen e kaluar kam parashtruar disa pyetje specifike, burimet e të cilave janë raportet zyrtare dhe shqetësimet e qytetarëve që po përballemi me një injorim total dhe mosshikimin e përgjigjes nga

drejtoritë përkatëse. Për drejtorinë e urbanizmit dhe inspektoriatit. Në raportin e juaj figuron se janë dhënë 34 leje ndërtimi. Pyetja ime është e përsëritur drejtor. Sa është përqindja e hapësirave publike dhe zonave të gjelbërta që janë siguruar për qytetarët tanë përmes këtyre lejeve, apo po vazhdojmë vetëm me betonizim të egër?! Poashtu, kërkoj llogari se si po menaxhohet dhe si po ndodhin ndërtimet në tokat bujqësore. Gjithashtu te Drejtoria e Shëndetësisë, drejtori pati premtuar që publikisht do t'i sjellë emrat e anëtarëve të komisionit për hartimin e specifikave, komisionit të vlerësimit dhe atij të pranimi të pajisjeve laboratorike. Ende nuk i kam marrë këta emra. Çfarë po fshihet pas këtyre komisioneve që po hezitojnë të ndajnë të dhënat me ne? Kryetar dhe Drejtori e Urbanizmit kam një pyetje shumë specifike lidhur me programin për banimin e përballëueshëm social. Në cilën fazë të këtij programi gjendet komuna jonë, pasi që qytetarët dhe familjet në nevojë kanë të drejtë ta dinë saktësisht se ku jemi në këtë proces. Gjithashtu në mbledhjen e marsit, te çështja e raportit të auditorit, gjatë diskutimit që e kam pasur në kuvend në lidhje me zbatimin e rekomandimit të auditorit dhe mbrojtjen e parasë publike është konstatuar edhe një rast skandaloz. Një lokal në zemër të qytetit shfrytëzohet tash e shtatë vite pa paguar asnjë cent qiraje. Dëmi ka arritur 30.000 euro. Komuna nuk ka ndërmarrë asgjë për të inkasuar këtë borxh. Andaj si anëtare e kuvendit në emër të qytetarëve, kërkoj të na thuhet se për cilin lokal bëhet fjalë.

Diellza Pllana - anëtare e kuvendit- Pasi i përshëndeti të gjithë deklaroi: sot me shkas dua të diskutoj një çështje që prekë drejtpërdrejtë shumë të rinj të komunës sonë për bursat studentore. Shkak i diskutimit është për shkak të vonesës së hapjes së konkursit për bursa këtë vit. Pa e nisur këtë diskutim duhet pranuar se gjatë qeverisjes së kryetarit Idrizi, janë bërë ndryshime shumë të mira në favor të të rinjve dhe përfituesve të kësaj skeme të bursave. Është rritur edhe shuma që këta studentë përfitojnë. Është rritur edhe numri i bursave. Për herë të parë studentë të Vushtrrisë që studiojnë jashtë Kosovës marrin bursë pikërisht nga komuna e Vushtrrisë. Fatkeqësisht deri para qeverisjes Idrizi, këta studentë nuk janë trajtuar siç duhet. Këto ndryshime tregojnë se ka pasur edhe reflektim edhe gatishmëri për ta përmirësuar skemën e atëhershme ekzistuese. Megjithatë pikërisht për shkak se janë bërë këta hapa pozitiv, besoj se duhet të kemi guximin të flasim edhe për problemet që kanë mbetur ende pa u zgjidhë. Një problem që duhet përmendur është hapja shumë e vonshme e këtij konkursi për bursa. Do doja shumë që sot të ishte prezente këtu drejtoresha e arsimit, është fundi i muajit maj, po hyjmë në muajin e gjashtë të vitit veçse ka përfunduar viti akademik 2025-2026, pikërisht në kohën kur studentëve iu kanë dashur këto të mira financiare prej komunës, këto nuk po jepen duke shtyer kështu ndarjen e kësaj mbështetje financiare për muajt e verës. Unë do doja shumë që edhe të dimë prej drejtoreshës pse ka ndodhur kjo vonesë këtë vit për shkak se viteve të kaluara ndonëse janë dhënë në pjesën e parë të vitit, është hapë konkursi shumë më herët. Këtë vit ka një vonesë që nuk e dimë për çka edhe a do të vazhdohet kjo praktikë edhe gjatë viteve të tjera, nëse po, do duhet gjithsesi të ndryshohet për shkak se e humb efektin e kësaj mbështetjeje financiare te studentët. Gjithashtu një tjetër problem i kësaj skeme ekzistuese të bursave është numri ende i kufizuar i bursave krahasuar me kërkesën reale të studentëve. Nga analizat që kam bërë rezulton se dhjetra studentë kanë mbetur jashtë skemës, jo vetëm për shkak të konkurrencës, por edhe për shkak se disa drejtime nuk janë përfshirë fare në konkurs. Kjo është ndjenjë zhgënjyëse për shumë studentë të juridikut, ekonomikut, edukimit, shkencave politike dhe fushave të tjera të cilët ndihen sikur puna dhe angazhimi i tyre nuk po vlerësohen prej komunës ose vlejnë më pak veç pse nuk janë drejtim deficitar. E kuptoj tërësisht praktikën e dhënies së bursave për këto drejtime deficitare që e ka bërë pikërisht qeverisja e zoti Idrizit, në mënyrë që ta orientoj studentin drejt këtyre drejtimeve, drejtimet që janë të nevojshme për Kosovën. Mirëpo, unë mendoj që edhe këta studentë të paktën në mënyrë simbolike duhet të përfshihen në këtë kategorinë e studentëve

që përfitojnë mbështetjen financiare prej komunës të paktën prej vitit të ardhshëm. Gjithashtu propozoj që qyshë nga ky vit për shkak se ende nuk është hapur konkursi dhe jemi në kohë. Në rezultatet e këtyre bursave të përfshihet edhe sistemi i pikëzimit me qëllim që secili kandidat të dijë qartë mënyrën se si është vlerësuar. Sa pikë ka marrë prej notës mesatare, sa prej kategorisë sociale që i takon, sa prej aktiviteteve ekstra kurrikulare që vlerësohen. Një mënyrë e tillë e shpalljeve të rezultateve e forcon besimin mes komunës edhe studentëve. Gjithashtu me të drejtë besoj që e ngrej edhe nevojën për zgjerimin e kategorive sociale ku kërkoj që të mbështeten familjet që kanë dy ose më shumë studentë duke i shtuar pikë këtyre studentëve që konkurojnë për këtë mbështetje financiare prej komunës. Praktikisht nuk ka ndodhur më herët në sistemin e bursave. Besoj se ndryshimet që i përmenda duhet të jenë veç fillimi i një reforme më të lehtë dhe sistemi gjithpërfshirës të bursave. Gjithashtu dëshiroj edhe të shpreh gatishmërinë time ndaj drejtoreshës së Arsimit që jam e gatshme dhe unë të kontribuoj si anëtare e këtij kuvendi për çdo ndryshim të mirë studentëve.

Fidan Bejta- anëtarë i kuvendit- Pasi i përshëndeti të gjithë deklaroi: E kam një kërkesë për kryetarin, për drejtorinë përkatëse. Punimet në stadium të qytetit po besoj që kanë me fillu shpejt. Uroj dhe besoj që me fillu shpejt. Edhe iu kemi gëzuar këtij lajmi pavarësisht kush e ka marrë primatin, kush e bën. Nuk kanë bërë mirë që nuk kanë ftuar kryetarin se është zot shtëpie. Ajo është çështje tjetër. Çfarë na mbetet neve është që ata djem që do të na përfaqësojnë në superligë kanë me mbetë për një kohë pa stadium. E jona mbetet rregullimi i kushteve për zhvillim të stërvitjeve pse jo edhe lojrave në fushën e Dobërllukes ku është stadiumi aktual. Andaj ky mund të jetë një problem i madh, i cili mund t'i kushtoj ekipit tonë shumë.

Ymer Haradinaj- anëtar i kuvendit- në fjalën hyrëse, pasi përshëndeti të pranishmit deklaroi: në seancat e kaluara i kam ngritur disa çështje për të cilat kam marrë përgjigje gjatë seancave, po që në terren nuk janë realizuar. E para ka qenë çështja e rregullimit të një rruge në fshatin Stanofc të Epërm, vendosja e disa gypave. Drejtori atë ditë më ka premtuar që do të rregullohet brenda javës. Drejtori është këtu, ende nuk ka asnjë lëvizje. Po ashtu i kam ngritur disa çështje që kanë të bëjnë me varrezat në Druar. E po ashtu gjatë asaj seance nënkryetari i komunës ka dhënë premtim që ajo çështje do të rregullohet, çështja e një kanalizimi atje, por ende nuk është bërë asgjë as nga nënkryetari as nga drejtoria përgjegjëse. E po ashtu dua të potencoj një çështje. Çështja e vizitës së kryeministrit. Unë i përgëzoj qytetarët e Vushtrrisë për investimet që po i bën qeveria në rregullimin e stadiumit. Kjo është një çështje shumë me vlerë. Janë afër 5 milion euro investime. Dua t'i tregoj kryetarit të komunës që kanë qenë shumë projekte në vitin 2025 të cilat kanë qenë bashkëfinancim i qeverisë të Kosovës, i ministrive përgjegjëse bashkë me komunën e Vushtrrisë. Kryetari i komunës ka prerë shirita pa pjesëmarrjen e ministrave dhe kryeministrit. Prandaj mos luani rolin e viktimës. Është e drejtë e kryeministrit. Ne veç i gëzohemi investimeve që vijnë nga qeveria e Kosovës.

Rrahim Ajeti- anëtar i kuvendit- Pasi përshëndeti të pranishmit deklaroi: Unë nuk kam replikë, por kam një pyetje për kryetarin dhe për ish-kryeministrin. Edhe unë, kam pranuar shumë pyetje nga qytetarët lidhur me premtimin për ndërtimin e rrethrotullimit të Varrezat e Dëshmorëve në Dumnicë. A do të realizohet ky projekt, apo do të ketë të njëjtin fat edhe projekti i stadiumit, i cili u përdor vetëm si premtim gjatë fushatës zgjedhore? Gjithashtu, një shqetësim tjetër që po ngritet vazhdimisht nga qytetarët ka të bëjë me segmentin rrugor nga rrethrotullimi deri te Emona. Ka paqartësi rreth institucionit përgjegjës për këtë rrugë; disa pretendojnë se është nën kompetencën e komunës, ndërsa të tjerë thonë se është nën përgjegjësinë e ministrisë. Prandaj, do të ishte e dobishme që kryetari të na sqarojë, si neve ashtu edhe qytetarëve, se cili institucion e ka në administrim dhe mirëmbajtje këtë rrugë. Gjatë fushatës zgjedhore shpeshherë fajësia i atribuohet

komunës, ndërkohë që ne kemi informacion se kjo rrugë është projekt dhe përgjegjësi e ministrisë. **Ferit Idrizi- kryetar i komunës**- tha se vërtetë çdo shqetësim që është me vend unë e mbështes. Sa i përket zvarritjes së punimeve në sheshin e qytetit është e vërtetë po gjithëka është lidhur me aspektin financiar. E kemi shpjeguar disa herë para qytetarëve të Vushtrisë që jo vetëm sheshi por edhe shumë projekte nuk kemi mundur me i ndjek operatorët me pagesa. Arsye e kësaj është kontrata kolektive e mësimdhënësve që deri më tash përmbaruesi përmes gjykatës na i ka marrë 13.600.000 euro. Është një shumë e madhe e mjeteve. Të gjithë e dini se për një komunë si komuna e Vushtrisë që buxhetin për investime kapitale për vitin 2025 e ka pasur 5.032.000€ dhe me i marrë kësaj komune 13.600.000€ 000 euro, është një goditje shumë e madhe financiare dhe jemi duke u përballë me sfida jashtëzakonisht të mëdha. Normalisht, kontratën kolektive që e ka nënshkruar Ministria e Arsimit e një qeverie është dashur me e përmbush qeveria e Republikës së Kosovës. Nuk e ka përmbushur. Jemi në këtë situatë dhe pikërisht për këtë janë zvarritur punimet për asgjë tjetër. Pra ka qenë dashtë të shtyhet afati për përmbarimin e punimeve. Të njëjtë e kemi situatën edhe me tregun e gjelbërt, njëjtë e kemi situatën edhe në rrugën “Bekim Berisha”, të njëjtë e kemi situatën edhe me shumë e shumë projekte të tjera, por tash gradualisht jemi duke e marrë veten edhe kemi siguruar mjete për pagesë. Besoj fuqishëm që sheshi veç është në përfundim e sipër dhe do të përfundohet para se të vijë mergimtarët. Sa i përket sigurimit të atyre tribunave në shesh, do ta marr me shumë seriozitet këtë propozim tuajin, se të them të drejtën aty ka shumë shkurte edhe kurrë nuk kam menduar që hyjnë nxënësit. Por po iu them sinqerisht që vlera e këtij sheshi do të tregohet me kohë. Vetëm atë dite që u luajt finalja në Gjakovë dhe atje nuk i kanë lejuar tifozët FORCA të shkojnë. Siç e di unë kam qenë vetëm 50 bileta, për atë e kemi vendosur një monitor edhe atë ditë kam thënë se me të vërtetë ia ka vlejtur investimi në shesh. Ia ka vlejtur investimi në shesh se u bë një atmosferë sikur me qenë në stadium. Për sa i përket se në cilën fazë ndodhet programi i përballimit social. Nga ana e komunës janë kryer të gjitha procedurat, ka mbetur vetëm të bëhet alokimi i mjeteve nga ana e ministrisë. Jemi në bashkëpunim me ministrinë në këtë drejtim dhe besoj që do të fillojë së shpejti. E kemi pyetjen e Diellzës. Është e njëjta situatë me mjetet financiare sikurse përgjigja që i dhashë Dritës. Me të vërtetë në momentin e fundit na i kanë marrë mjetet financiare dhe nuk kemi pasur mjete që i zotërojmë. Jemi duke bërë përpjekje maksimale me gjetë mjete se me të vërtetë ne çdo vit kemi ndarë bursa studimi siç e thatë edhe ju dhe tash në këtë vit është goxha vështirë që një student të mendojë që s'ka me marrë bursë. Sa i përket programit të studimeve e kemi trajtuar këtë temë edhe me vetë studentët ndoshta është një prej arsyeve që unë e kam zhvilluar karrierën edhe në arsim edhe në politika të arsimit. Po besoni, që edhe iu kam thënë haptazi sikurse studentët të ishin fëmijët e mi. Mua më dhimbsen studentët që sot studiojnë juridik, sepse me hy në agjensitë e statistikave të Kosovës, e sheh që kemi prodhuar jurista dikund për 7 milion banorë. Kjo ka qenë arsyeja që të shkoni në profile deficitare, shkoni në mjekësi, shkoni në arkitekturë, inxhinieri civile, janë edhe nja gjashtë apo shtatë profile të programimit inteligjencë artificiale, domethënë aty ku të rinjë edhe të rejat vërtetë mbasi t'i mbarojnë studimet nuk trokasën në derë të komunës. Po tani do ta shqyrtojmë bashkarisht edhe në planifikimin buxhetor se tani ka ardhur qarkorja e parë buxhetore. Unë po mendoj që do të fillojmë të stabilizohemi financiarisht prej vitit të ardhshëm edhe do ta kemi një mundësi edhe për politikat arsimore edhe për politikat sociale se edhe grupet sociale domethënë me nevoja të veçanta i kemi shumë keq por nuk ka mjete. Ne mundemi me marrë vendime sa herë të don kuvendi, por problemi është nëse s'ka mjete atëherë është një mashtrim më i madh sesa mos me marrë fare atë vendim. Sa i përket çështjes që e ngriti Fidani, dëshiroj të them disa fjalë. Para së gjithash, e përsëritet dhe e uroj fillimin e punimeve në stadium. Për mua nuk ka rëndësi nëse jam ftuar apo jo në një ngjarje të tillë. Me shumë sinqeritet

po ju them të gjithëve, e veçanërisht atyre që janë anëtarë të Lëvizjes Vetëvendosje, se unë gjithmonë kam treguar respekt për Kryeministrin. E kam respektuar dhe vazhdoj ta respektoj, sepse ai është Kryeministri i vendit tim. Besoj se, nëse ka një kryetar komune që është përpjekur me gjithë përkushtimin e tij të unifikojë faktorin politik dhe të respektojë institucionet shtetërore, ai jam unë. Përfaqësuesit e institucioneve qendrore i kam pritur gjithmonë me respektin më të madh dhe me mikpritje të veçantë. Nuk e përmend këtë rastësisht. I kam mirëpritur sa herë që kanë ardhur dhe, po ashtu, do t'i mirëpres edhe në të ardhmen, sa herë që vizitojnë komunën tonë. Edhe tjetra është që ne e kemi nënshkruar kontratën me Ministrinë e Kulturës. Projekti i stadiumit të qytetit është bashkëfinancim. Janë ndarë 1 milion euro nga komuna e Vushtrisë. Sa i përket çështjes për stërvitje edhe për lojërë e kemi menduar, kemi biseduar edhe me presidentin e klubit edhe me trajnerin do të bëjmë zgjidhje. Duhet me bë një zgjedhje se me të vërtetë tani jemi në superligë. Kjo është ekipa jonë. Sa i përket pyetjeve të Ymerit këtyre do t'iu përgjigjen drejtorët se kanë qenë në seancën e kaluar unë do të përgjigjem te bashkëfinancimi edhe te prerja e shiritave. Unë e di që ti beson edhe duhesh me më besu që nuk ka projekt që është realizuar e ka qenë në bashkëfinancim e nuk kanë qenë të ftuara institucionet qendrore. Si për rrugën Drenica ashtu edhe për të gjitha rrugët e tjera i kam ftuar. Edhe më ka thënë ish-ministri i infrastrukturës të kërkoj shumë falje kryetar nuk mund të vijmë për shkak të fushatës. Unë po flas sinjerisht edhe unë jam ai që e kam guximin edhe intelektual edhe qytetar që të mbrojë një të drejtë edhe kurrë s'do të ndodhë që unë të anashkaloj. Kur ka qenë fushata larg ka ardhë. Kur është afruar fushata ka thënë jo. Ndoshta edhe po na dëgjon tani drejtpërdrejt le të reagon. Prandaj unë nuk jam anashkalues. Unë s'do të anashkaloj kurrë askënd. Edhe për ditë të çlirimit i ftoj të gjithë deputetët, i kanë vendet e caktuara. Dhe iu bëj thirrje të gjithëve që të jenë të pranishëm me 17 qershor, ditën e çlirimit. Sa i përket pyetjes së Rrahimit për rrethin e Dumnicës tek Varrezat e Dëshmorëve. Ne i kemi bërë kërkesë disa herë ministrisë. E di që është edhe premtim i kryeministrit. Tani e kanë radhën ta bëjnë atë rreth që është shumë i domosdoshëm. Nëse nuk kanë mundësi ne e kemi një kontratë dhe ajo nuk ka kosto. E marrim e bëjmë vetëm le të na japin pëlqimin. Po them para të gjithë qytetarëve e bëjmë ne le të na lëshojmë pëlqimin. Nuk besoj që do të pengohet komunikacioni. Nuk do të na marrë kohë as një javë ditë. Do ta bëjmë rrethin vetëm na duhet një pëlqim nga ministria. Nëse mundeni me ndiku si anëtarë të kuvendit ndikoni. Thuani një pëlqim na nevojitet edhe shkojmë bashkë. Sa i përket aksit rrugor nga rrethrrrotullimi te Emona deri në dalje, dëshiroj të sqaroj se kjo rrugë është nën menaxhimin e Ministrisë së Infrastrukturës. Për këtë kemi bërë kërkesë zyrtare që kjo pjesë të na bartet në kompetencë, duke qenë se nga autostrada deri në Smrekonicë është në administrim të ministrisë. Meqë tashmë është ndërtuar autostrada, kemi propozuar një ridizajnim të saj. Gjendja aktuale është bërë e ndërlikuar, sidomos te rruga "2 Maji", te rruga "Bekim Berisha" dhe te udhëkryqi te rruga "Shote Galica". Për këtë kemi menduar që të vendosen rrethrrrotullime, të cilat do ta lehtësonin ndjeshëm qarkullimin. Tani jemi në pritje të përgjigjes nga ministria për bartjen e kompetencave, ndërsa aktualisht mirëmbajtja dhe asfaltimi i kësaj pjese mbeten përgjegjësi e tyre. Duke qenë këtu, dua të ndaj edhe një informacion tjetër me keqardhje. Dje ka pasur mungesë të ujit të pijshëm për qytetarët, veçanërisht në Ditën e Bajramit. Gjatë gjithë ditës kam marrë shumë telefonata dhe ankesa nga qytetarët, dhe situata ka qenë shqetësuese. Dua të sqaroj se furnizimi me ujë është përgjegjësi e kompanisë rajonale të ujësjellësit, jo e komunës, megjithatë ne kemi bashkëpunim të vazhdueshëm me ta. Edhe pse qytetarët shpesh e adresojnë problemin te komuna, ne kemi qenë në kontakt të vazhdueshëm me kryeshefin e kompanisë dhe situata është normalizuar më vonë. Kërkoj ndjesë qytetarëve për këtë situatë të krijuar, veçanërisht duke qenë se ka ndodhur në një ditë feste. Edhe vetë kam qenë i prekur nga kjo gjendje, pasi jetoj në të njëjtën zonë dhe e kam përjetuar

drejtpërdrejt. Ju falënderoj për mirëkuptimin dhe besoj se iu jam përgjigjur pyetjeve në mënyrë të qartë dhe të drejtë.

Isa Hajrizi- drejtor i drejtorisë Mbrojtje dhe Shpëtim- Pas përshëndetjes së të pranishmëve deklaroi: U dëgjuan disa kërkesa prej Vlora Tahirit. Më së pari dëshiroj t'i përgjigjem kryetares të grupit parlamentar të PDK-së. Ne si drejtori e kemi të formuar komisionin për vlerësimin e dëmeve. Vlerësimin e dëmeve komisioni e ka kryer me plot ndershmëri edhe me përpikmëri dhe e kanë dorëzuar në komisionin qeveritar. Ata e kanë pranuar vlerësimin e dëmeve. Ata kanë thënë se kanë lëshuar vendim për kompensim, po flas këtu për vitin 2023 por dëmet nuk janë kompensuar ende. Vendimi nuk ka ardhur veç kanë thënë gojarisht. Vendimi nuk ka ardhur as tek kryetari as në drejtori. Ju siç e dini komuna nuk ka buxhet për me i pagu dëmet prej fatkeqësive natyrore.

Benjamin Shala- drejtor i Drejtorisë së Sherbimeve Publike- pasi përshëndeti të gjithë të pranishmit deklaroi: Çështja e kanalizimit dhe varrezave në Druar është kryer para dy seancave atë ditë kemi intervenuar pasdite. Përveç nëse ka pasur ndonjë dëmtim mbrëmë ose dje ditën e Bajramit përndryshe çdo gje është në rregull.

Melihate Basholli-Latifi- kryesuese e kuvendit- Të nderuar anëtarë të Kuvendit, prej Komitetit për Politikë dhe Financa i kemi dhe dy pika shtesë që do t'i hedhim në votim sot për t'i shtuar në rend të ditës. Hap diskutim për rendin e ditës.

Fatmire Cecelia- anëtare e kuvendit- Atëherë unë sot para jush për të tretën herë me radhë po propozoj me fut si pikë të rendit të ditës mbështetjen financiare për fëmijët me nevoja të veçanta. Konkretisht fëmijët që janë të prekur me autizëm dhe me sindromin Down. Fatmirësisht në statistikë janë vetëm 16 fëmijë që vijnë në mësimin e që mundemi me i mbështet. 13 janë me autizëm ndërsa tre janë me sindromin Down. Unë kam propozimin vetëm për këto dy kategori. Ju kisha lut që me mbështet këtë propozim sepse me të vërtetë ka nevojë me i mbështet këto familje. Nuk është një kosto e madhe që brenda muajit me i financu me nga 100 euro. E që i bie brenda vitit për një fëmijë 1200€. Kërkoj nga ju që ta mbështetni këtë propozim.

Ferit Idrizi- kryetar i komunës- Faleminderit, kryesuese. Faleminderit, Fatmire. Është mirë që paraprakisht të dihet buxheti. Nuk është mirë as unë e as ti të bëjmë politikë para qytetarëve, sepse bëhet fjalë për kategorinë më të ndjeshme. Gjithashtu, nxjerrja e një vendimi pa pasur mjete financiare për ta realizuar është edhe më keq. Për shembull, ende u kemi mbetur borxh atyre qytetarëve të cilëve u janë djegur stallat e shtëpitë para dy vitesh. Kemi marrë të dhënat, kemi shkuar për t'i vizituar, por nuk kemi pasur mjete financiare dhe nuk kemi mundur t'i mbështesim. Po ju tregoj se nuk është vetëm ai numër; ka edhe të tjerë me nevoja të veçanta. I kam nxjerrë të gjitha të dhënat për personat me nevoja të veçanta. Në sistem kemi gjithsej 195 fëmijë. Janë 195 fëmijë me probleme shëndetësore dhe këto kategori nuk mund të ndahen. Siç e përmenda edhe më herët, po të mos na ishin marrë ato mjete, rreth 13.600.000 euro nga përmbaruesi, sot do të kishim mjete dhe subvencione për t'i mbështetur këto kategori. Kur mbështeten kategori të tilla, duhet të mbështeten të gjitha. Prandaj, para çdo projekti duhet të dihet vlera financiare dhe kostoja. Duhet të përcaktohet sa mjete nevojiten dhe të pyetet ekzekutivi nëse ka mjete në dispozicion. Nëse nuk ka, atëherë projekti planifikohet për vitet e ardhshme. Tashmë ka ardhur qarkorja buxhetore dhe ne nuk e votojmë buxhetin vjetor pa e përfshirë paraprakisht një planifikim të tillë. Kjo është një politikë parimore dhe transparente. Nuk mund të propozojmë diçka vetëm që ta votojë kuvendi. Ju mund të votoni dhe të propozoni, por unë nuk mund ta ekzekutoj nëse nuk ka mjete financiare. Gjithçka lidhet me mundësitë financiare. Për këto kategori, transporti është falas. Shumë prej tyre janë subvencionuar, sidomos familjet që kanë bërë kërkesa dhe që janë në gjendje të rëndë sociale. Ka familje që kanë fëmijë me Sindromën Down dhe njëkohësisht përballen me vështirësi

ekonomike. Ka edhe familje që e kanë gjendjen ekonomike më të mirë dhe nuk kanë pasur nevojë për mbështetje financiare, ndonëse përballen me të njëjtën sëmundje. Ne kemi bërë përpjekje t'i mbështesim të gjithë sipas mundësive. Aktualisht, 24 fëmijë në shkolla janë të përfshirë në sistemin e asistencës me asistentë. Gjithashtu, pritet të rekrutohen edhe 12 mësuese asistente, të cilat tashmë e kanë përfunduar trajnimin e veçantë njëvjeçar për punë me këta fëmijë. Prandaj, le të punojmë bashkërisht, sepse edhe ju përfitoni para qytetarëve kur politikat bëhen si duhet. Tani jemi në fillim të procesit të planifikimit buxhetor dhe ka ardhur qarkorja e parë buxhetore. Do t'ju paraqesim të gjitha të dhënat: sa borxhe kemi, sa kontrata kemi dhe cila është gjendja financiare. Analizoni, kalkuloni dhe ejani me propozime. Ju përfaqësoni qytetarët e Vushtrrisë dhe i njihni më së miri lokalitetet ku jetoni. Kjo do të ishte politika e duhur. Edhe meritat do t'i merrni ju, sepse ju votoni buxhetin. Mirëpo, të kërkohet vazhdimisht mbështetje financiare për grupe të ndryshme në një kohë kur nuk ka mjete financiare, është e pamundur të realizohet. Nuk ka mjete. Edhe projekti i Banesave të Bardha është zvarritur për shkak se nuk kemi mundur t'i përcjellim pagesat. Tani, nga të hyrat dhe investimet kapitale, pagesat do të vazhdojnë dhe projekti duhet të përfundojë. Më së shumti do të kisha dashur që Banesat e Bardha të përfundonin para zgjedhjeve, sepse do të përfitoja politikisht më shumë, pasi i kam premtuar. Por nuk kam mundur. Ndërkaq, për rrethrotullimin kemi kontratë me operatorët. E kam fjalën se aktualisht nuk ka mjete në thesar për të ndarë për këtë kategori. Prandaj, kryesuese dhe të nderuar anëtarë, e di ndjeshmërinë që secili prej jush ka për këtë kategori. Tani kemi qarkoren buxhetore dhe do të planifikojmë politika arsimore, sociale dhe politika të tjera. Kur të votojmë buxhetin në shtator, atëherë do t'i kemi gjërat më të qarta.

Melihate Basholli- Latifi- kryesuese e kuvendit- Edhe në Komitetin për Politikë dhe Financa e kemi diskutuar mjaftueshëm këtë temë. Besoj se askush nuk është kundër kësaj çështjeje, por sfida qëndron te gjetja e mundësisë reale për realizimin e saj.

Fatmire Cecelia- anëtare e kuvendit- Kryetar më së pakti ndoshta këtu në kuvend unë di me bë politikë dhe bëj politikë sidomos me këtë çështje nuk bëj politikë asnjëherë sepse ne që kemi anëtarë të familjes në këto kategori më së shumti na dhemb e kështu që këtu te ne fatkeqësisht duhet me të provu Zoti për me bashkëndje. Edhe nuk është që po bëj politikë absolut. Ju kam treguar edhe ju kam kërkuar më herët me më dhënë statistika për buxhet. Nuk është një kosto e madhe 19.200 €. Ju kryetar mundeni me e marrë vendimin mbasandej me zbatu retroaktiv sikurse shumë vendime të tjera, apo ju kryetar keni edhe vendim në fuqi që është për fëmijët të posalindur dhe nuk i keni financuar me vite. Është e treta seancë që propozoj radhazi gjithashtu iu kam dërgu email drejtorisë së shëndetësisë dhe nuk kam marrë përgjigje.

Refik Maloku- anëtar i kuvendit- Pasi i përshëndeti të gjithë deklaroi: Mua më vjen mirë që kryetarit kur i vijnë ia nisë me u arsyetu, kur nuk i vijnë e përdorë atë metodën tjetër. Po të pyes kryetar a e ke rishikuar buxhetin ti kur ke vendosur me i pagu nga 22.000€ disa këshilltarë në disa pozita që s'kanë ekzistuar. A ke menduar a do të ketë mjete financiare për fëmijët të cilët i përmendi Fatmirja apo ke mendu veç për me i përmbush interesat e tua personale dhe të individëve që ti ke afërsi familjare me ta? Mos u viktimizo. Kryetari po thotë për arsye se nuk kemi mjete, ne nuk po mundemi me e zbatu këtë. Duhet paraparë me kohë mjetet. A i ka paraparë kryetari me kohë mjetet kur 22.000€ ju kanë ndarë të afërmeve të vet për pozita të cilat nuk ekzistojnë e tash thotë nuk ka mjete financiare për njerëz të sëmurë.

Ferit Idrizi- kryetar i komunës- Sesi e kam bërë menaxhimin e kanë vlerësuar qytetarët e Vushtrrisë. Ma kanë dhënë votën, kanë thënë mirë ke menaxhuar, vazhdo. Veç po dua një sqarim rreth asaj që unë jam shumë i bindur. Nuk po dua të mendoj që ka anëtarë të kuvendit që nuk i din kategoritë buxhetore edhe prej cilit kod buxhetor mundesh me i mbështet konsulentët, prej cilit

kod buxhetor mundesh me shtru një rrugë, prej cilit kod buxhetor mundesh me i mbështet këto kategori. Kodi buxhetor, subvencione dhe transfere. Edhe nëse ke mjete financiare më shumë se të mjaftueshme në investime kapitale edhe në mallra e shërbime nuk mundesh me i pagu këto se është e caktuar. Unë e di që ju e dini. Prandaj këtë po e them këtë për qytetarët, sepse krijohet përshtypja se diku ka mjete financiare, ndërsa diku tjetër jo. Subvencionet dhe transferet kanë një kufi të caktuar. Edhe kur planifikohet buxheti, ekziston një tavan buxhetor që përcakton sa mund të ndahet nga buxheti i përgjithshëm për subvencione dhe transfere. Jam plotësisht dakord me atë që tha Fatmirja. Ne nuk i kemi paguar lehonat pikërisht sepse ato mbulohen nga kodi i subvencioneve dhe nuk kemi pasur mjete financiare të mjaftueshme. Nëse nuk ke pasur mjete për t'i paguar lehonat dhe as rastet e tjera që trajtohen përmes subvencioneve, siç janë dëmtimet nga djegia e shtëpive, stallave apo raste të ngjashme, atëherë si mund të merret një vendim i ri për të rritur edhe më tej obligimet financiare? Kjo është ajo që po them: të mos nxitohemi, por së pari ta stabilizojmë buxhetin. Do të ishte mirë, si intelektualë dhe si përfaqësues të qytetarëve, të kishte reagime edhe për çështje të tjera. Për shembull, të thuhej: "Paguani mjetet për mësimdhënësit, sepse komunat janë rënduar financiarisht dhe janë vënë në vështirësi." Nuk e kenë thënë këtë, por nuk po ju kritikoj për këtë. Unë personalisht do ta kisha thënë, sepse besoj se kam guximin intelektual për t'ia thënë çdo qeverie. Mirë, gjithçka është në rregull. Por tani, në vend që përgjegjësia t'u atribuohet atyre që na kanë lënë barrën prej 13 milionë e 600 mijë eurosh, kritikata drejtohen ndaj kryetarit të komunës, duke u thënë se nuk po realizon këtë apo atë projekt. Unë po e them në mënyrën më transparente të mundshme: nga kodi që e përmendi profesori Refik, këto pagesa nuk mund të realizohen. Kjo është e qartë. Dua ta sqaroj këtë para jush, sepse prej muajsh janë paraqitur shumë propozime nga ana juaj dhe të gjitha kanë qenë të mirëseardhura. Nuk ka asgjë të keqe në këtë. Faleminderit.

Melihate Basholli- Latifi- kryesuese e kuvendit- Pra kjo çështje po propozoj që secili anëtar i Kuvendit le të angazhohet edhe më shumë ashtu siç jemi angazhuar disa prej anëtarëve të kuvendit që këtë çështje ta trajtojmë me buxhetin e vitit të ardhshëm për arsye se ashtu siç e shpjegoj kryetari dhe drejtori i buxhetit në komitet na e ka shpjeguar që nuk kemi vijë buxhetore ku përmes së cilës mund t'i paguajmë këto kategori. Kalojmë te pikat që i kemi diskutuar në Komitetin për Politikë e Financa dhe që i kemi rekomanduar për kuvend. Pika e parë është propozim-vendim për dhënien e titullit Nderi i Qytetit me të cilin do të nderohet zotëri Nesim Ispahiu. Kush është për ta shtuar në rend të ditës këtë pikë? E hedh në votim. Jemi të pranishëm 22 anëtarë sipas sekretarisë. **Kush është për, për ta shtuar këtë pikë të rendit të ditës? 21 janë për. Konstatohet që shtohet edhe kjo pikë e rendit të ditës.** Pika e radhës është propozim-vendimi për dhënien e çmimit emblema e Vushtrrisë, e cila me të cilën do të nderohet zotëri Janus Halili. Kush është për? **21 janë për. Konstatohet që dhe kjo pikë shtohet në rend të ditës për shqyrtim.** Pika që e propozoi Fatmirja nëse kishim pasur dakordancë, e kishim lënë për buxhetin ashtu siç duhet me qenë me rregulla. Në votim mundemi me hedhë po ne nuk jemi për me votuar diçka që nuk realizohet.

Diellza Pllana- anëtare e kuvendit- Zonja Fatmire edhe seancave të kaluara ka propozuar ta fus në rend të ditës këtë pikë. Edhe seancave të kaluara kemi propozuar që të na sjellët një dokument. Në qoftë se thonë që është e mundshme. Dëshirojmë të kemi një dokument sesi bëhet sipas jush. T'i kemi statistikën sepse unë nuk dua të votoj për diçka që nuk mundemi me ia dhënë më pastaj mbështetjen financiare. Kështu që kërkoj prej teje të paktën kur jepni propozime duhet me pas një dokument, sepse s'kemi pse votojmë as për as kundër as abstenim kur nuk dimë për çka. Kështu që nëse mendon që realizohet, na trego sesi realizohet, më jep edhe statistikën dhe unë pastaj zgjedhë sesi me votu.

Melihate Basholli- Latifi- kryesuese e kuvendit- U diskutua atë çka e tha Diellza, e tha edhe

kryetari, e ka thënë edhe drejtori, po e them edhe unë vazhdimisht meqënëse ju po insistoni, unë po e hedh në votim kush është për ta aprovuar, por realizimi nuk është i sigurtë.

Blerina Shala- anëtare e kuvendit- Përsëendetje për të gjithë. Edhe në Komitet për Politikë e Financa e kemi diskutuar të njëjtën çështje është e tepërt gjithë këtë diskutim për këtë kategori kaq të ndjeshme. Fatmire nuk mundesh me i nda fëmijët me autizëm edhe me ngecje në zhvillim sepse problemet i kanë të njëjta. Si të propozohet kur nuk kemi buxhet. Ata do të presin për t'i marrë mjetet financiare e ato mjete nuk kanë me i marrë asnjëherë. Kryetari le të na premton që do të ndahet në buxhet por jo vetëm për këtë pjesë por për të gjithë.

Melihate Basholli- Latifi- kryesuese e kuvendit- Faleminderit. Me të vërtetë është një kategori e ndjeshme dhe pothuajse secili ka dikë në familje ndoshta jo fort të ngushtë që i ka me këto probleme. E rëndësishme është me realizu këtë. Meqënëse kryetari, drejtori i buxhetit po na tregojnë që nuk ka mundësi buxhetore, unë po propozoj që për shkak se këta nuk kanë mjete, ekzekutivi s'ka mjete financiare, nuk do ta procedojmë as për këtë seancë, por do të punojmë që kjo pikë e rendit të ditës të shtohet në një nga seancat pas miratimit të buxhetit.

Ferit Idrizi- kryetar i komunës- Jo vetëm këta 13 që i përmendi zonja Fatmire, por përfitues do të jenë 195 kur planifikohet buxheti. Pra që me qenë përfitues të gjitha kategoritë.

Melihate Basholli- Latifi- kryesuese e kuvendit- Unë po kërkoj edhe prej kryetarit edhe prej drejtorive përkatëse, prej anëtarëve të kuvendit ta japin maksimumin që me pas numrin e saktë edhe materialin me pas të kompletuar me numër të fëmijëve, me diagnoza, me vijë buxhetore në mënyrë që ne ta fusim në rend të ditës. E hedh në votim rendin e ditës me dy pika shtesë që i votuam individualisht.

Në fund të debatit jashtë rendit të ditës, kuvendi pas votimit me 18 vota “për” aprovoj këtë:

R E N D I T E

1. Miratimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 30 prill 2026;
2. Propozim – vendim për bartjen e të hyrave vetanake nga viti 2025 në vitin 2026;
3. Informatë lidhur me Qarkoren buxhetore për vitin 2027 dhe miratimi i Planit të veprimtë për dëgjimet publike;
4. Propozim – vendim për themelimin e Këshillit Komunal për Siguri në Bashkësi;
5. Raport i vlerësimit të dëmeve nga fatkeqësitë natyrore dhe fatkeqësitë tjera për periudhën mars – gusht 2025 dhe periudhën janar – shkurt 2026;
6. Propozim-vendimi për dhënien e titullit “Nderi i Qytetit”;
7. Propozim-vendimi për dhënien e çmimit “Emblema e Vushtrrisë”;
8. Pyetje dhe përgjigje.

1. Miratimi i procesverbalit nga mbledhja e rregullt e kuvendit të komunës së Vushtrisë e mbajtur në datën 30 prill 2026.

Pas shqyrtimit kuvendi pas votimit me vota “unanime” aprovoj procesverbalit nga mbledhja e rregullt e kuvendit të komunës së Vushtrisë e mbajtur në datën 30 prill 2026, me vërejtejn që të korrigjohet ermi i z. Lorik Maxhuni, ku në vend të tij duhet të jetë z. Mentor Hasani.

2. Propozim-vendim për bartjen e të hyrave vetanake nga viti 2025 në vitin 2026;

Isuf Jashari, drejtor i DBF-së-sqaroi se bazuar në Ligjin për Ndarje Buxhetore dhe Ligjin e Vetqeverisje Lokale është obligative që bëhet, propozim vendimi për bartjen e të hyrave vetanake nga viti 2025 në vitin 2026. Ju e dini që muajin dhjetor për shkak të tejkalimit të hyrave që kemi pasur këtë seancë të kuvendit patëm marrë vendim dhe patëm bërë shpërndarjen. Mirëpo të hyrat e dhjetorit barten në vitin 2026. Në Komitetin për Politikë dhe Financa kemi diskutuar shuma e bartjes së mjeteve është 575.404.93 €. Nga kjo shumë në kategorinë e mallrave dhe shërbime bartet shuma 231.979.45. Në kategorinë e komunalive bartet shuma 30.000 € dhe kategorinë e investimeve kapitale bartet shuma 313.400 25.48. Mirëpo me propozim të Sekretarisë së Kuvendit kemi bërë një ndryshim të vogël. Arsyeja pse shumë herë është diskutuar në këtë seancë të kuvendit lidhur me pajisjet e zërimit dhe votimit elektronik për sallën e Kuvendit. Mirëpo meqenëse është koha dhe momentet që ta inkorporojmë si projekt në tabelën 4.2 si projekt të ri, kostoja e projektit është 60,000.00 €, 40.000 € merren nga kategoria e mallrave dhe shërbime në programin 18184 në infrastrukturë publike dhe 20.000 € merren nga kodi i projektit 54798 ndërtimi i rrugëve lokale Dumnice Maxhunaj Stanov Lumadh Vilanc dhe Ropic e Pestovë do të thotë kjo shumë mbartet në këtë projekt të ri që është pajisje për zërim dhe votim elektronik për sallën e Kuvendit të komunës së Vushtrisë vetëm me këtë ndryshim të tjerat janë projekte ekzistuese të gjitha që janë kontraktuale që duhet me u përfunduar dhe realizuar në vijim.

Drita Dibrani, anëtare e kuvendit- tha se çështja që dëshiron me u ndërlidh tek propozimi i drejtorit. Drejtori përmendi që vetëm është votimi elektronik edhe zërimi. Këtu mungon, po besoj që tash secili e dimë që salla e kuvendit e reja zhvendos në Qendrën Rinore, është jep hapësira atje për rinovimin e objektit të ri për kuvendin komunal. Mendoj që në këtë vijë buxhetore duhet të futet edhe inventare, por edhe kamera më të pastra për shkak se me këto kamera të cilat janë edhe po transmetohen tek publiku po janë shumë të vjetra edhe nuk kemi mundësi që secili prej anëtarit të kuvendit kur flet edhe nga vendi të merret pamje e saktë për kush për çka po flet. Kështu që mendoj që duhet ta vendosim edhe pjesën e kamerës por edhe të inventarit të ri për arsye se ky inventar nuk i plotëson të gjitha kriteret për të vazhduar përpara me punimet e kuvendit.

Melihate Basholli-Latifi, Kryesuese e kuvendit- tha se sa i përket inventarit, në këtë kod mirëpo është çështja që kostoja e saj është shuma 60.000 euro do të thotë nuk e dimë që ai a i përballon kjo shumë komplet propozimet e juaj. Dhe shtoj se inventari mundem me u realizuar edhe në kategorinë e mallrave dhe shërbime. Pajisje, zërim dhe votim në këtë kuadër hynë edhe kamera. Unë si anëtare e kuvendit nuk nuk kisha pranuar me e prek këtë shumë me inventar. Inventari propozoi me qenë një vijë tjetër buxhetore.

Fatmire Cecelia, anëtare e kuvendit- unë sot e kuptova lokacionin e sallës së kuvendit. Nuk po mendoj që është ide e mirë me i nxënë hapësirat e rinisë Qendra Rinore është e dedikuar për rininë Vushtrriase. Nuk mendoj që është mirë me marrë hapësirën e rinisë se është e vetmja hapësirë që ata mund me shfrytëzu. Keni lokacione të ndryshme e keni këtu që Drejtoria e Inspektimeve nuk është në objekt po mendoj që është më mirë me adaptu këtu diku brenda komunës ose një objekt tjetër me paraparë e jo në Qendrën Rinore. Edhe ju kisha lutur e kam si kërkesë edhe nëse veç se ju përdorni arogancën e numrave e keni pushtetin e krejt sallën e kuqe në Qendrën Rinore mos me prish nëse mendoni definitivisht me shku atje me ba sallën jashtë që është në anën e majtë e jo me prish Sallë e Kuqe, sepse është një investim shumë i mirë edhe është një investim afatgjatë.

Ymer Haradinaj, anëtar i kuvendit-tha se sa i përket bartjes së të hyrave vetanake nga viti 2025 në vitin 2026. Unë desha veç disa sqarime këtu tek planifikimi urban, inspeksioni, Vushtrri nga projektet po thuhet që është ndërtimi i rrugëve lokale dhe përmendet fshati Stanoc. Tash a është fjala për Stanocin e Epër apo Stanocin e Poshtëm është më mirë me definuar sepse janë dy

Stanoca edhe për afarësisht me ditur shumë për secilin fshat po ashtu po përmenden edhe Dumnicat prandaj është mirë me kanë të specifikuar jo me lënë në mënyrë të përgjithshme e pastaj me e keqpërdorë këtë emër sepse zyrtarisht pra e dimë që në komunën e vërtë janë dy emërtime, Stanoci i Epërm dhe Stanoci i Poshtëm dhe kjo duhet definuar. Çështja tjetër është tek blerja e veturave për administratën komunale në Vushtri ku janë të planifikuara me 72.639 €. A është fjala këtu për pagesën e këtyre dy veturave që janë blerë më herët veç janë ardhë apo do të blehen edhe dy vetura të reja për administratën? Sepse sigurisht që ka nevojë për këto vetura. Po e dimë që ka edhe disa vetura për të cilat ju paguani qira vazhdimisht kur na vijnë listat për shpenzime pra keni qira të paguar. Pyetja është a janë këto mjete për veturat që kanë ardhë në komunë. Sespe drejtori në njërin nga seancat ka thënë që kanë qenë të planifikuar me buxhetin e vitit të kaluar dhe janë realizuar në mbledhjen e kaluar më kujtohet drejtor që ke thënë apo janë vetura të reja dhe për fund desha veç me i kujtu kryesueses pasi që po thotë se kam përvojë shumë të gjatë kryesuese kur një asamblesë propozon diçka për rend të ditës je e obliguar me qitë propozimin në votim a votohet për/kundë apo abstenim mbeetet në vullnetin e kuvendit . Asambleistja jonë bëri një propozim për të cilën në mënyrë dinake kryesuesaj iku dhe nuk e qiti propozim e saj në votim. Po ta kujtoj se po thua se kam përvojë goxha të gjatë edhe e di që ke përvojë prandaj e ke pas obligim ligjor me e hedhë në votim propozimin e asambleistes së Lëvizjes Vetëvendosje.

Isuf Jashari, drejtor i DBF-së-sqaroi se sa i përket pyetjeve të cilat i parashtroi deputeti lidhur me blerjen e veturave është shumë e vërtetë që është projekt që kemi votuar edhe në këtë seancë të kuvendit. Ne i kemi udhëhequr të gjitha procedurat e rregullta ligjore dhe kemi marrë dy automjete qysh kam thënë edhe më herët për shkak se me ju ik automjeteve të cilat i kemi me lezing dhe me mbet si aset i komunës. Mirëpo përmbaruesi na i ka marrë kaq mjete fiks dhe kemi qenë të obliguar me përmbyllë kontratën dhe me plotësuar këtë pjesë të mirë. Ndërsa sa i përket projektit ndërtim i rrugëve lokale, ky është një projekt qysh nga vitet e kaluara që bartet vit mbas viti për shkak se fondin për bashkëfinancim me donatorë të cilin e kemi qysh e kemi rastin tek asfaltimi i rrugëve në Dumeç me Ministrinë e Infrastrukturës nga ky kod i projektit zakonisht plotësojmë pjesën e kontratës të cilën e kemi me bashkëfinancim me donatorë.

Në fund të debatit lidhur me këtë pikë të rendit të ditës, kuvendi pas votimit me 16 vota “për”, 5 vota “kundër” vendosi me sa vijon:

1. Me këtë vendim bëhet bartja e të hyrave vetanake nga fondi (21) për vitin 2025 në vitin 2026 në kategoritë si në vijim:

1.1 Mallra dhe shërbime	231,979.45 €
1.2 Komunalit.....	30,000.00 €
1.3 Investime kapitale.....	313,425.48 €
Totali i mjeteve të bartura.....	575,404.93 €

2. Për zbatimin e këtij vendimi obligohen Drejtoria për Buxhet dhe Financa dhe drejtoritë e tjera kompetente komunale.

3. Pjesë përbërëse e këtij vendimi janë, tabela për shpenzimet operationale dhe tabela e shpenzimeve kapitale.

4. Ky vendim hynë në fuqi tridhjetë (30) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

3. Informatë lidhur me Qarkoren buxhetore për vitin 2027 dhe miratimi i Planit të veprimit për dëgjimet publike;

Isuf Jashari, drejtor i DBF-së paraqiti sqarime para anëtarëve të kuvendit, duke shtuar se me datën 15/5/2026 në bazë numrit të protokollit 06/40 Ministria e Financave ka dërguar qarkoren buxhetore 2027/01. Kjo qarkore buxhetore përmban kufijtë fillestarë buxhetor si për nivelin qendror ashtu dhe kufijtë buxhetor për nivelin komunal për periudhën 2027-2029. Buxheti sipas qarkores për vitin 2027 është 31.683.485 €. Granti i përgjithshëm është 13.366.900.992 €. Granti i arsimit është 10.703.206 €. Granti i shëndetësisë është 3.231.203 €. Shërbimet rezidenciale i kanë të njëjta 200.000 €. Shtëpitë e komuniteteve 230.000 €. Gjithsej të hyrat nga grantet qeveritare janë 27.731.331 €. Kategoria e të hyrave vetanake janë 3.952.154 € që do të thotë granti plus hyrat vetanake arrijnë shumën 31.683.485 €. Tek granti i përgjithshëm e kemi një rritje prej 1.56.296 që i bie përqindje 8.65. Tek arsimi e kemi një ulje prej 58.404 €. Tek granti i shëndetësisë e kemi një rritje prej 5.23 apo në vlerë monetare i bie 9.151 si dhe te shtëpitë e komuniteteve. Vitin 2026 i kemi pas 200.000, në vitin 2027 i kemi 230.000, është një rritje prej 30.000 € që do të thotë në total është një rritje prej 1.621.550 € apo 5.12%. Në bazë të qarkores buxhetore dhe në bazë kalendarit kohor lidhur me planin buxhetor jemi të obliguar bashkëpunim me kryetarin, kryesuesen t'i formojmë grupet për hartimin dhe marrjen e kërkesave për planin e buxhetit për vitin 2027-2029.

4. Propozim – vendim për themelimin të Këshillit Komunal për Siguri në Bashkësi;

Pas shqyrtimit të kësaj pike të rendit të ditës, kuvendi pas votimit me vota “unanime” vendosi me sa vijon:

1. Me këtë vendim themelohet Këshilli Komunal për Siguri në Bashkësi në këtë përbërje:

- 1.1. **Ferit Idrizi**, Kryetar i Komunës – Kryesues;
- 1.2. **Reshat Kovaqi**, Komandant i Stacionit Policor – anëtar;
- 1.3. **Naile Bekteshi**, Drejtoreshë për Arsim – anëtare;
- 1.4. **Bajram Beqiri**, Përfaqësues i sektorit të emergjencave – anëtar;
- 1.5. **Aldi Blyti**, përfaqësues i FSK-së – anëtar;
- 1.6. **Hadije Zuqaku**, Kryetare e Këshillit të Prindërve të Arsimit të komunës anëtare;
- 1.7. **Remzije Zekolli**, Zyrtare për Barazi gjinore dhe të Drejta të njeriut – anëtare;
- 1.8. **Stefan Markovic**, Kryesues i Komitetit për Komunitete;
- 1.9. **Ejup Haziri**, Përfaqësues i Bashkësisë Islame në Vushtrri – anëtar;
- 1.10. **Lubomir Jasiq** Përfaqësues i Kishës Ortodokse Serbe – anëtar;
- 1.11. **Banush Elezi**, Përfaqësues i Kishës Protestante Ungjillore – anëtar;
- 1.12. **Bozidar Aritonovic**, Përfaqësues i komunitetit serb - anëtar;

- 1.13. **Semra Gjushinca Llapashtica**, Përfaqësuese i komunitetit turk – anëtar;
- 1.14. **Adem Hoti**, Përfaqësues i komunitetit ashkali – anëtar;
- 1.15. **Selatin Emini**, Përfaqësues i komunitetit rom – anëtar;
- 1.16. **Habib Mustafa**, Përfaqësues i Këshillit Lokal për Siguri në Bashkësi për fshatrat Bivolak, Zhilivodë, Gllavatin, Prelluzhë, Stroc, Beçuk dhe Mihaliq – anëtar;
- 1.17. **Gjylsime Feka**, përfaqësues i Këshillit Lokal për Siguri në Bashkësi, për fshatrat: Banjskë, Gojbulë, Sllatinë, Tërllabuq, Karaçë, Begaj, si dhe “Kalaja” Vushtrri – anëtar;
- 1.18. **Ekrem Merovci**, kryesues i Ekipit Veprues për Siguri në Bashkësi – anëtar;
- 1.19. **Branisllav Vuksanoviq** Përfaqësues i Zyrës Komunale për Komunitete dhe Kthim anëtar
- 1.20. **Vildane Mulaku**, Kryetare e Shoqatës “Martirët e Lirisë” (OJQ) – anëtare;
- 1.21. **Hakif Kalludra**, Përfaqësues i komunitetit të biznesit – anëtar;
- 1.22. **Isak Hyseni**, Përfaqësues i komunitetit të peronave me aftësi të kufizuara anëtar;

2. Kryesuesi dhe anëtarët e Këshillit komunal për Siguri në Bashkësi detyrat dhe përgjegjësitë do t'i ushtrojnë në pajtim me Udhëzimin Administrativ të MPB-së për themelimin e KKS-së.

3. Mandati i KKS-së është i njëjtë me mandatin e anëtarëve të Kuvendit të Komunës.

4. Në rast se anëtari/ ja i/e KKS-së nuk merr pjesë në tri mbledhje radhazi ose për çfarëdo sjellje ose veprim e komprometon funksionin efektiv të KKS-së, me propozimin e Kryesuesit të KKS-së, Kuvendi i Komunës emëron anëtarin tjetër të këtij këshilli.

5. Ky vendim hynë në fuqi tridhjetë (30) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

5. Raport i vlerësimit të dëmeve nga fatkeqësitë natyrore dhe fatkeqësitë tjera për periudhën mars-gusht 2025 dhe periudhën janar – shkurt 2026.

Vlerë Tahiri, anëtare e kuvendit- atëherë unë po i qëndroj edhe njëherë kërkesës time që me dërguar dhe me i bë presion ministrisë përkatëse edhe për raportet e viteve të kalumara, pasi që komuna është duke e kryer punën, mirëpo po has në vesh të shurdhër prej Ministrisë përkatëse. Kështu që unë kërkoj sot fjalën edhe drejtorit edhe të kryetarit që kanë me bë presion edhe qytetarët nuk kanë me u dëmtuar më prej këtyre premtimeve.

Ymer Haradinaj, anëtar i kuvendit-tha se e dimë që gjatë këtyre viteve kemi pasur dëme edhe fatkeqësi natyrore edhe si pasojë e motit të ligë, edhe motit të ftohtë, edhe shiut, edhe erave, edhe motit të nxehtë. Dhe në vitin 2024 një mikut tim i ka ndodhur po ashtu një dëm i madh prej fatkeqësive natyrore. Këtu në kuvend e pata propozuar për një ndihmë, mirëpo në të njëjtën seancë të kuvendit, një asamblestë në atë kohë i PDK-së e patë prpozuar për një ndihmë për shërim dhe unë pata tërheq kërkesën me marrëveshje me kryetarin që me formu një komision edhe me shku me bë vlerësimin e dëmeve në atë familje. Ka qenë një dëm i madh jashtëzakonisht kështu që asnjëherë nuk na ka bërë, nuk na ka pruar raport rreth atij dëme që është bërë. Kisha kërkuar që në kuadër të këtyre dëmeve, jo pse ai është familjari imi, por të gjitha dëmet të cilat janë bërë nga periudha që e përmendi kolegja asambleistja nga Partia Demokratike, pra nga viti 2023, 2024, 2025, 2026 le të përmbledhen të gjitha dhe ne e dimë tash po e shohim situatën si është me financa, po së paku që të jenë të përfshime në raport t'i aprovojmë si kërkesa edhe t'i dërgojmë

në ministri të linjes përkatëse e të cilët besoj që ka qenë edhe premtim i kryeministrit që do të kompensohen. Prandaj kërkoj edhe njëherë pra nëse është bërë vlerësimi të sjellet ai raport në njërën nga seancat e kuvendit. Por jo veç të atij, por edhe të gjithë domethënë bizneset, fermerët, familjet, ekonomitë familjare që janë dëmtuar të përpilohet raporti t'ju dërgohet herë ministrive të linjës dhe besoj që ato pastaj do të kompensohen.

Ferit Idrizi, kryetar i komunës-tha se pajtohet plotësisht me anëtarin e kuvendit z.Ymer Haradinaj. Kur ishte duke diskutuar për rendin e ditës këtë çështje unë i përmenda që ka të them sinqertë nuk dasha me përmend kështu me emër po e lash me u kuptu se ka që dikund janë djeg shtallat edhe janë bërë dëme në komunën e Vushtrrisë jo vetëm rasti tash meqë e përmendi po e përmendi më lirshëm i mikut tuaj që është nga Novolani po i kemi edhe disa raste të djegies së shtëpive bile tash në fund para dy tre jave në fshatin Ceceli dikujt ju ka djegur shtëpia në tërsi. Prandaj ai deklaroi që bashkë me Drejtorinë për Emergjencë do ta ripërsërisim kërkesën edhe do t'i përmbledhim të gjitha këto dëme që janë shkaktuar. Dhe mos të marrim si presion se na jeni institucione dhe funksionojmë në mënyrë institucionale. Do përsërisim ripërsërisim kërkesën edhe do ta do ta dërgojmë. Meqë jam këtu, nëse më lejon dhe nuk me keqkuptoni unë kisha kërkuar prej juve kryesuese, e ke zyrtarin këtu që po të rrin në krah, është jurist, është jurist me përvojë dhe kërkoj prej juve sinqerisht kërkoj që ta ndihmoni kryesuesen kur është në pyetje tek votimi në aspektin juridik që mos të bëhen shkelje se nuk është vendi yt veç me ndejt aty e me të pa anëtarët e kuvendit, sepse këtu shumë qartë është përcaktuar me ligj për pikat shpesh të rendit të ditës. E thotë neni 47 pika 2 e Ligjit për Vetqeverisje Lokale <çdo deputet anëtar i kuvendit ka të drejtë të propozojë, domethënë të kërkojë shtimin e një pike të rendit të ditës gjatë seancës së rregullt të kuvendit të komunës, nëse çështja që kërkohet të përfshihet në rend të ditës, është urgjente dhe me rëndësi publike. Prandaj si do që të jetë ajo nuk ishte çështje urgjente sepse po të ishte do të ishte zgjidhur ngaherë. Çështje urgjente është na vjen një rast që duhet urgjentisht me çu me me intervenu për shembull në spital ose diçka tjetër. Megjithatë mbështeti mos t'i kthehem edhe njëherë. Nuk e kam te ju tash. Tash e kam te stafi i komunës, tek juristi që në situata të tilla mundet me i thënë kryesueses, shiko, ka të drejtë me propozu secili, por janë mundësitë buxhetore, ka kaluar në komitet, nuk i ka marrë votat në komitet edhe mos na futni në rend të ditës. Pra, kërkoj që herve të tjera të jeni më të konsoliduar. Kryesuesja ka përvojë, por nuk është juriste. E ka juristin, Sekretarinë e Kuvendit. Edhe në mënyrë që mos të kemi keqkuptime mes anëtarëve me mendu që i kemi votat edhe s'ju pyesim fare. Ajo teori nuk vlen. Keni me qenë të respektuar, keni me qenë të mbështetur, por ta dimë çka po shtim në rend dite. Lidhur me raportin e dëmeve kërkoj që të përgatitet me shtojcat me të gjitha kërkesat. Krejt kjo në kuadër të komisioni në kuadër të Drejtorisë së Emergjencave, drejtor prej teje kërkoj që të ripërsëritet ajo edhe pse jo edhe anëtarëve të kuvendit dërgoju në email është transparencë pse mos me ju dërgu me ditë për secilin ku jemi dhe çka mundem me bë.

Në fund të debatit lidhur me këtë pikë të rendit të ditës, kuvendi pas votimit me vota "unanime" vendosi me sa vijon:

1. Me këtë vendim aprovohet raporti i Komisionit Komunal lidhur me Vlerësimin e Dëmeve nga Fatkeqësitë Natyrore dhe Fatkeqësitë e tjera në Komunën e Vushtrrisë, për muajt: mars- korrik 2025 dhe janar-shkurt 2026.

2. Komisioni Komunal për Vlerësimin e Dëmeve nga Fatkeqësitë Natyrore dhe Fatkeqësitë tjera ka dalë në terren dhe ka bërë evidentimin e dëmeve të shkuara nga moti i ligë (erërat e

forta, breshëri dhe zjarret), që kanë mbretëruar në periudhën e sipërcekur, në Komunën e Vushtrrisë.

3. Komisioni i cekur më lartë ka bërë vlerësimin e dëmeve dhe ka shqyrtuar kërkesat e qytetarëve dhe konform të gjeturave ka evidentuar dhe kalkuluar shumat e mjeteve financiare në vlerë totale prej 129,368.20 € (njëqind e njëzet nëntëmijë e treqind e gjashtëdhjetë e tetë ero e njëzetë centë), si në të mbjellat bujqësore e po ashtu edhe dëmet e shkuara në ekonomitë familjare dhe këto të dhëna për dëmet janë të bashkangjitura në mënyrë tabelare në raportin e komisionit.

4. Pjesë përbërëse e këtij vendimi është Raporti i Komisionit Komunal për Vlerësimin e Dëmeve nga Fatkeqësitë Natyrore dhe Fatkeqësitë tjera, në Komunën e Vushtrrisë.

5. Për zbatimin e këtij vendimi obligohen Drejtoria për Mbrojtje dhe Shpëtim e Komunës së Vushtrrisë dhe po ashtu ky vendim i dërgohet edhe Agjencisë për Menaxhimin e Emergjencave (AME).

6. Ky vendim hynë në fuqi tridhjetë (30) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

6. Propozim-vendimi për dhënien e titullit “Nderi i Qytetit”;

Refik Maloku, anëtar i kuvendit-tha se askush nuk është kundër këtij zotrie që ta marrë këtë titull, por kërkoj që herve tjera mos të vendoset kuvendi para situatave dhe fakteve të kryera. Ai kërkoj të ketë koordinim dhe bashkëpunim mes kuvendit dhe kryetarit të komunës që këto çmime të jenë vërtet meritore dhe të aprovohen me unanimitet të plotë.

Fatmire Cecelia, anëtare e kuvendit- tha se të dy çmimet që na kanë ardhur “Nderi i Qytetit” dhe “Emblema e Vushtrrisë” janë vërtetë dy persona shumë meritore. Për dallim nga ajo që çdo propozim që vjen prej neve nuk e mbështetni ne i mbështesim edhe fuqishëm. Z. Nesim Ispahiu është një njeri që e lidh historinë të kaluarën me të tashmen. Jeni arritur me fotografi i tij, dhe Vushtrria si qytet identifikohet me fotografi të z. Nesim Ispahiu. Ndërsa sa i përket z. Januz Halili, edhe ky është një person që me të vërtetë e meriton, është një ushtar i Ushtrisë Çlirimtare të Kosovës, njëri ndër personat që është më i lënduar në luftën, domethënë është invalid i luftës që ende ka plagë dhe është një person që vërtetë e meriton. Lufta e UÇK-së, e dimë që është e shenjtë. Grupi jonë i mbështetë këto dy propozime.

Ferit Idrizi, kryetar i komunës-tha se i falenderon të gjithë parafolësit edhe për sugjerime edhe për qasjen. Me të vërtetë këto prpozime janë proceduar përmes komisionit. Është një komision si e kërkon ligji, por jemi munduar që këto figura me të vërtetë me qenë të pakontestueshme. Nuk është hera e parë që bashkarisht votojm edhe jepim çmime çdo herë kemi qenë unik në këtë drejtim, edhe në mandatin e kaluar kur kemi qeverisur. Pa gabime nuk jemi por jemi munduar që me të vërtetë këto dy figura, z.Nesim Ispahiu, që është nder edhe për neve edhe për mua si kryetar edhe për juve që në një moshë çfarë e ka ai dhe me një qasje pozitive, me një vitalitet çdo herë mendon për qytetin e Vushtrrisë. Unë ju falenderoj për qasjen, po edhe për z.Januz Halili si një invalid i luftës. Tash nuk po dua me shpërfaq atë, me tregu që kam qenë një prej protagonistëve kur është plagosur. Edhe Januzi është plagosur, duke çminuar minat ku gjatë ditës i vendosnin

forcat serbe edhe ato i vëzhgonte me dylbi, dhe më tej shkonte dhe i çmontonte, sa që ka pas mina me thes që ai i ka hapur rrugët edhe për popullatën civile për me u largu prej Qyqavice por edhe për ushtarët e UÇK-së. Po fati i keq e deshti se në një moment në një minë befasie bjen edhe i shkon këmba Jonuzit. Kështu që unë veç mundem me ju falenderuar për këtë unifikim të votës. Jeni të merituar kur jemi në këto raste duhet të qendrojmë unik.

Ymer Haradinaj, anëtar i kuvendit-tha se zakonisht kur ka qenë çështja për dhënien e këtyre çmimeve kemi qenë unik. Mirëpo përveç këtyre dy çmimeve që janë sot, kuvendi në bazë të rregullores ka të drejtë me i dhënë edhe 10 mirënjohje. Pra, ne e dimë që po e shohim në vazhdimësi kryetari i komunës që shpërndan mirënjohje. Po kisha pasur dëshirë këtu nëse është e mundur me propozu një person për mirënjohje. Është fjala për z. Ukshin Malokun pas vdekjes. Ai ka vdekur para një kohe, por që e ka dhënë një kontribut të jashtëzakonshëm nga mërgata për Stanocin e Epërm, konkretisht për nxënësit dhe mësimdhënësit e shkollës fillore "Migjeni", Stanoc i Epërm, gjatë periudhës para lufte, gjatë luftës, por dhe pas luftës. Pra, vazhdimisht ai person ka dërguar ndihma, veçmbathje, por edhe mjete financiare për nxënësit dhe mësimdhënësit e shkollës. Ka vdekur para dy tre muajsh sigurisht. Më kanë treguar që ka qenë kryetar i komunës. Ai krejt anëtarët e familjes i ka jashtë këtu i ka dy vëllezër, Ismet Malokun edhe Adem Maloku. Pra nuk është çështje politike. Besoni që ata janë njerëz që kanë kontribuar vazhdimisht, por në shenjë mirënjohje dhe respekti. Pra pas vdekjes, postmortum kisha propozuar që t'i jap një mirënjohje z.Ukshin Malokut nga Stanoci i Epërm.

Ferit Idrizi, kryetar i komunës- tha se e mbështetë plotësisht propozimin e z.Haradinaj. dhe shtoj se për herë të parë ka filluar në Stanoc të punoj, dhe e di kontributin e tij. Është e vërtetë ashtu, por ajo që kisha dashur me theksu e kam përmendur edhe njëherë arsyeja pse s'po i sjellim në kuvend. Tash jemi tuke plotësuar dhe ndryshuar rregulloren e punës të kuvendit. Edhe unë nuk kam dashur që mirënjohjet të shkojnë përmes kuvendit, sepse po do me thënë thjesht kuvendi është për punë më të mëdha. Tjetër ashtu siç është e përcaktuar me rregullore është e normuar që mirënjohjet me u ndarë në votim të fshehtë. Ju e dini që në të kalumen goxha keq i kena sfiduar. U ardh për shembull babai i një dëshmorit ka hy në votim të fshehtë dhe nuk e kanë votuar. Janë lënduar familjet për mos me u lënduar. As ju as familjet unë s'kam pranuar, të shkohet në këtë formë. Por po e marrë si obligim me e nda atë mirënjohje se është i merituar z. Ukshin Maloku.

Në fund të debatit lidhur me këtë pikë të rendit të ditës, kuvendi pas votimit me vota "unanime" vendosi me sa vijon:

1. Me këtë vendim, në rastin e shënimit të "Ditës së Çlirimit të Vushtrrisë", me titull "Nderi i qytetit" i Komunës së Vushtrrisë, nderohet z. Nesim Ispahiu, për kontributin e dhënë për qytetin e Vushtrrisë.

2. Dorëzimi i kësaj dekorate (titulli) do të bëhet nga Kryetari i Komunës, më datë 17 qershor- "Ditën e Çlirimit të Vushtrrisë".

3. Për zbatimin e këtij vendimi obligohen Kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

7. Propozim-vendimi për dhënien e çmimit “Emblema e Vushtrisë”;

Pas shqyrtimit të kësaj pike të rendit të ditës, kuvendi pas votimit me vota “unanime” vendosi me sa vijon:

1. Me këtë vendim, më datë 17 QERSHOR, me rastin e ditës së Çlirimit të Vushtrisë, me çmimin “Emblema e Vushtrisë“, nderohen z. Januz Halili për kontributin e dhënë për çështjen kombëtare.

2. Dorëzimi i çmimit do të bëhet nga Kryetari i Komunës, më 17 qershor 2026, me rastin e Ditës së çlirimit të Vushtrisë.

3. Për zbatimin e këtij vendimi obligohen Kryetari i Komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrisë.

8. Pyetje dhe përgjigje.

Drita Dibrani, anëtare e kuvendit-përseriti pyetjen saj edhe njëherë duke rishikuar, ku dhe sa është ndarë sipërfaqja e dhënë për ndërtimin e banesave sociale se këtë nuk e kam si informatë që të paktën të dimë se ku gjendemi me këtë proces.

Ymer Haradinaj, anëtar i kuvendit-tha se pyetja e tij konkrete do të ishte për Drejtoreshën e Arsimit. Po pasi që s'është drejtoresha e arsimit këtu, po e shoh që është kryetari. Po e shoh këto ditë që po organizohen shëtitje një ditë nga ana e shkollave. Konkretisht e kam fjalën për shkollën fillore dhe të mesme të ulët “Migjeni”, Stanoc i Epërm. Ata sot e kanë një shëtitje një ditore me klasë e shtatë, teta dhe të nënta. Kurse prej klasës së parë deri në klasën e shtatë sot fare nuk janë duke mbajtur mësim. E dimë që kalendarin për vitin shkollor e harton dhe e miraton Ministria e Arsimit. Nuk e di a ju kanë marrë në një farë forme leje Drejtoreshës Arsimit a kryetarit të komunës apo drejtoria e shkollës “Migjeni” do ta kompensojë ditën e humbur për nxënësit të cilët sot ata janë në shëtitje pra nga klasë e nënta kurse nxënës të tjerë janë në shtëpi përfshij edhe fëmijët e mi.

Ramadan, Parduzi, anëtar i kuvendit- pyeti kryetarin e komunës tek shkolla SHMU1, a ka mundësi të ngritet një kompleks sportiv për nevojat e nxënësve dhe qytetarëve.

Ferit Idrizi, kryetar i komunës-njoftoi se lokacioni për ndërtimin e banesave sociale është ndarë apo është caktuar tek objekti i Qendrës së Mjekësisë Familjare. Saktësisht aty ku po propozohet kompleksi sportiv nga z. Ramadan Parduzi, kjo për arsye se se ajo ka qenë pronë e komunës. Me thënë të drejtën unë e pata propozuar te kjo Qendra e të Moshuarve në atë parcelë, po meqë kjo domethënë është me fletë-poseduese është pronë e AKP-së atëherë ministria tha ne investojmë vetëm në prona komunale. Pronë komunale patëm aty dhe ato i kemi dhënë për ngritjen e kompleksit të banesave sociale. Sa i përket pyetjes së z.Ymer Haradinaj ceku se nuk është në dijeni për këto po të premtoj që menjëherë nesër kam me intervenuar për këtë rast nuk kanë të drejtë me ndërpre procesin mësimor. Sipas Udhëzimi Administrativ për vizita dhe ertskusione edhe brenda komunës edhe jashtë komunës edhe tash do të shikojmë nëse dikush e ka marrë në përgjithësi të vete ka me marrë në përgjegjësi të vete edhe masat disiplinore që janë të parapë sipas

legjislacionit në fuqi. Lidhur me çështjen e ngritur nga z. Ramadan Parduzi, për kompleksin sportiv ceku se ajo pronë është ajo parcelë është e dedikuar për banesa të banimit të qëndrueshëm që jemi në bashkëpunim me ministrinë adekuate. Por, sa i përket atij kompleksi, hajde gjatë hartimit të buxhetit për vitet e ardhshme se ai s'bëhet veç për 2027, po më duket është 2027/2028. I shikojmë parcelat, të dimë idenë çka sa po duam, qysh je i fushës adekuate edhe e marrim, e vendosim e promovjmë që është domethënë një produkt, një propozim i mirë dhe mund ta zhvillojmë si projekt të përbashkët.

Mbledhja përfundoj në ora 14:10

Bastri Duraku


Procesmbajtës

Melihate Basholli-Latifi


Kryesuesë e Kuvendit